

A palaç Antonini si fevelarà de aplicazion de 482 a scuele e intes aministrazions publichis

Leç sul furlan, ancjemò tant di fâ

Ai 14 di Dicembar une cunvigne par un belanç dai prins 10 agns

di SONIA SICCO

Cuâi sarano i pussibii di svilups pal avignì de lenghe furlane te scuele e te publiche aministrazion? La leç 482 di tutele des minorancis storichis linguistichis e finis chest an dis agns e mai come vuè si sint la dibisugne di scleari lis ideis su ce che nus spiete pal avignì, disegnant un senari che al clami ae responsabilizazion il mont de culture, de politiche ma ançe la coletività.

Di dut chest si fevelarà in ocasion de cunvigne *Scuele e Aministrazion publiche. Dis agns de leç 482 sore lis comunitàts linguistichis talianis*, inmanea de Federico Vicario, professor de Università di Udin delegât pe lenghe furlane par cont dal Centri Internazionâl sul Plurilinguism, e che si davuelzarà a Udin te Sale des cunvignis di Palaç Antonini lunis ai 14 di Dicembar.

La leç e introdûs la tutele des minorancis storichis linguistichis dal Stât talian, ven a stâi chês albanesis, catalanis, todescjis, greghis, slovenis, cravuatîs, francesis, franco-provençâls, furlanis, ladinis, ocitanis e sardis; l'obietif principâl de leç al è chel di judâ la promozion e l'ûs des lenghis minoritariis, tant te aministrazion



publiche tant te scuele, cu la introduzion dal insegnament e la concession di spazis pe lenghe inte television publiche.

Ma i dis agns, plui che di inmanea celebracions, a domandin di fâ i conts su ce che si à fat in chest timp par là indevant, o indaûr, sore la cuistion de tutele e de promozion de lenghe e de culture furlanis. Lis lenghis minoritariis a son a risli, simpri plui debilis e tantis a son lis domandis che nus sburtin a rifleti su chest teme. Tacant cul insegnament dal furlan tant che materie curicolârtes scuelis elementârs e mezanis. La 482/99 e disipline lis modalitâts pal insegnaments tes scuelis de infanzie, primariis e secundariis, cence dismenteâ lis universitàts che, in grazie de

lôr autonomie e dai stanziaments di belanç ordenaris, a metin in vore iniziativas a pro de ricercje scientifiche e lis ativitâts culturâls e formativis.

Te provincie di Udin scuasit il 70% des fameis al à domandât l'insegnament dal furlan. La scuele e à l'oblic di meti in vore la leç statâl 482 che e cjape bielzà dentri lis regulis riuart l'ûs dal furlan a scuele tant che argument, tant che imprest di insegnament. In chest câs, la norme e prescrif che ogni scuele, tal exercizi de sô autonomie organizative, e vedi di stabilî i mûts, i tims, i criteris di valutazion, lis formis di implei dai insegnants e i metodis par garantî l'insegnament de lenghe minoritarie, tignint cont ançe des domandis

La tutele des minorancis storichis in Italie

che i gjenitôrs a presentin tal moment des pre-iscrizions.

Ae leç 482, che no je simpri stade interpretade te maniere plui juste, al covente meti dai palets. Une vore impuartante e je le posizion de Region, che e varà di decidi cemût là indevant cumò che la sentence de Cort Costituzionâl e à refudât cualchi artucol de leç regionâl 29/2007 pe tutele de lenghe furlane, ançe se si à di precisâ che l'implant al reste in pits. In di di vuè, ançe se si son otignûts cierts risultâts tal setôr des minorancis linguistichis, al è ancjemò tant di fâ par rivâ ai obietifs prefissâts.

E propitu su chest teme si confrontaran ai 14 di Dicembar rapresentants de politiche, de aministrazion e de culture. A parteciparan ançe Cristiana Compagno, retore de Università dal Friûl, Edouard Ballaman, president dal Consei Regionâl e i assessôrs ae culture de Region Sardegna, Maria Lucia Baire, e de Region Friûl Vignesie Julie, Roberto Molinaro. Dongje, a fevelaran tancj

politics, esponents de academie e de scuele.

Silvana Fachin Schiavi e presiederà i lavôrs, che a saran vierts di Carla Marcatò dal Centri Internazionâl sul Plurilinguism de Università dal Friûl; si fasarà il pont sore il quadri normatif (cul contribût di Guglielmo Cevolin de Università dal Friûl), sore les scuele (cun Antonella Tozza de Direzione gjenêral dai Ordenaments scolastics dal Miur, Daniela Beltrame e Rosalba Perini dal Uffici Scolastic Regional dal Friûl Vignesie Julie); sul front de aministrazion a fevelaran Lorenzo Geninatti de Direzione dal Patrimoni culturâl e linguistic de Region Piemont, Marco Viola de Direzione dal Servizi minorancis linguistichis de Provincie di Trent e Giuseppe Corongiu de Direzione culture e lenghe sarde.

Une taule taronde, moderade di Giovanni Frau, e metarà a confront il mont de politiche, cui contribûts dai senatôrs Mario Pittoni, Tamara Blazina, Ferruccio Saro, il president de Provincie di Udine Pietro Fontanini, Domenico Morelli dal Confemili, Lorenzo Zanon de Agenzie regionâl pe lenghe furlane, Livio Semolic segretari dal Skg (Union Culturâl Economiche Slovene) e Francesco Marangon dal Consorzi Universitari dal Friûl.